

Mosaik Picassiette

Un exposicion unico na biblioteca

SRA Enrita Werleman y su studiantenan ta presenta nan exposicion 'Mosaik Picassiette'. E exposicion bunita aki lo ta habri for di diaranson 26 di februari te cu diabierna 5 di maart, durante orario regular di biblioteca na O'stad.

Mientras arte di mosaik tradicional ta uza pida chikito di mosaik, Pique Assiette ta uza pida di tayo corta pa forma un obra di arte. Na Frances e palabra Pique Assiette ta nifica "recogedo di tayo" of "ladron di tayo" y ta referi na uza tayo of recicla tayo kibra, sobra di glas y traha arte cu esaki. Un ehempel di picassiette tin na Chartres, Francia. E Maison Picassiette ta e trabou increibel di e artista Raymond Isidore.

El a nace casi na e mes un tempo cu Gaudi (artista renombra di Spaña). Isidore, cu a siña e tecnica su mes a cuminsa decora su cas. A ser bisa cu e tabata recoge y colecta tayonan di dumpnan y tambe tabata haya donacion di otro hende. Sin ningun training den arte Isidore a pone e pida pidanan den cement y pega nan riba e murayanan di su cas cu asina a bira un obra di mosaik. Awendia, La Maison Picassiette ta un destinacion turistico na Francia

Mas artistanan a sigui traha obranan cu tayo.

Solange y Alexandre Piffer, Artista International di Mosaik Picassiette.


Na luna di mei binidero e pareha artista procedente di Sao Paulo, Brasil lo bin Aruba pa duna algun Workshop di Mosaik Picassiette.

Alexandre y Solange Piffer ta procedente di Pompeia (city) - Sao Paulo, Brasil. E pareha a cuminsa traha arte di mosaik na 1999 cu soporta di mama di Alexandre, cu ta un artista tambe. Alexandre tabata traha e tempo ey como un welderdo fini y tambe cu arte di mosaik. Nan a traha y siña durante 20 aña y a bira experto den nan arte. Durante e ultimo 7 aña nan ta duna les. E prome obranan cu nan a traha tabata pa den nan cura.

Nan ta biba den un region cu ta hopi seco y ora e matanan perde nan flor nan mes a cuminsa traha flor di mosaik pa decora nan cura. Solange and Alexandre ta traha diariamente cu mosaik. Esaki ta nan entrada, trahando arte pa otro hende, crea, desaroja arte y tecnica nobo y duna workshop. Nan ta biaha rond di mundo educando, dunando lectura y dunando workshopnan. Nan a bishita paisnan manera Mexico, Alemania, Australia, Schotland y e aña aki tambe Aruba. Nan artenan di Mosaik ta inclui flornan y animalnan precioso.

Ate Mosa-Atelier Mosaic

Pa añanan Ate Mosa a sigui e artistanan aki y a tuma cursonan pa



domina e tecnica di mosaic picassiette y tambe a duna cursonan y siña otronan. A traha flornan, gay, shoco y otro bestianan. No ta facil pa yega na tayonan bunita y artistanan ta pasa busca tur caminda tayonan pa nan kibra.

E exposicion bunita aki lo ta habri for di diaranson 26 di februari te cu diabierna 5 di maart, durante orarionan cu Biblioteca ta habri. Publico ta bon bini na biblioteca. Apertura ta diamars dia 25 di februari di 6or y mey pa 8or.

Asina ta, si bo kibra un tayo bo ta bay mir'e na un manera diferente. Tayo no ta pa pone cuminda so, pero por traha obra di arte tambe cu ne. Pa mas informacion por tuma contacto cu Enrita Werleman na Ate Mosa tel. 661 3200.